

欽定剿平粵匪方略

欽定剿平粵匪方略卷十四 壬子年

六月初五日 甲申 程喬采奏言 臣於四月二十八

日抵省五月初三日聞道州失守當卽星夜折  
回在省僅止六日其團練壯勇盤詰奸細製造  
器械添鑄礮位各事宜業經撫臣督同司道趕  
辦惟省城形勢低矮現在擇要補苴並商同撫  
臣酌派官兵於城外扼要之處築壘紮營以壯

聲勢將來江西兵到再行酌撥駐守藉保無虞  
至永州兵勇漸多足資捍禦衡州現亦有兵勇  
二千餘名於城內外布置昨賽尙阿又派副將  
瞿騰龍來衡幫同經理兼赴長沙省城查勘情  
形臣固不敢一隅株守而以現在喫緊地方而  
論自應仍駐衡州居中控制至甯遠最關緊要  
該處有鄧紹良堵截於前和春跟追於後賊必

腹背受敵卽可聚而熾旃江華永明宜章三縣  
緊接道州爲逆匪西竄必由之路宜章與粵東  
之樂昌等縣交界向係匪徒出沒之區現均募  
勇派兵各圖守禦

程喬采又奏言臣接據總兵和春稟稱逆匪占  
踞道州現於北門外築營似無急竄之意該總  
兵於十九日以五成兵勇出隊在於五里亭築

營逆匪突出二三千人分三股撲來勢甚兇猛  
該總兵嚴陣以待將及一箭之地我兵槍礮環  
施斃賊十餘名該匪紛紛敗走現在衡永兩郡  
已分撥兵丁一千五十名壯勇七百名又調苗  
兵一千名前赴甯遠爲迎頭堵擊之用並聞總  
兵劉長清右江道張敬修所帶兵勇亦入楚境  
諒不日均可到齊奏入

上命軍機大臣傳諭程喬采曰逆匪占踞道州已逾月計各路調集兵勇不少加以本地團練亟宜乘該匪營巢未定之時設法合力攻圍該州地勢旣屬平坦與粵西崎嶇情形不同正可扼其要隘前後兜剿該督節制諸軍卽飭帶兵各員相機勦辦萬勿遷延該城內外爲賊匪偏脅之衆原其心跡不過畏累苟安豈肯甘心從逆乘此大兵雲集之時當先曉諭該

居民或偵探賊蹤或作爲內應及早掃除羣醜得以  
共安衽席是亦固結人心解散賊黨之一道也至圍  
困賊匪總以嚴斷接濟爲要米鹽之外尤應嚴防火  
藥透漏私售兵勇大半楚粵之民亦難保無與會匪  
暗通消息私爲接濟卽如廣東之羅鏡廣西之永安  
等賊皆圍困累月若鉛丸火藥真能斷絕逆匪豈能  
於彈丸之地憑恃兇燄久抗我軍耶此節最爲要著

務須認真查察勿受欺朦永州乃遏賊要路防堵不可稍疏該督與勞崇光統籌全局隨時知照賽尙阿聲勢聯絡使賊匪無可乘之隙庶可一鼓殲滅

初七日 丙戌 賽尙阿奏言逆匪現於道州城外加

築土城豎立木柵並於進城隘口設卡意欲久踞和春於五月初七日會督各鎮將帶領兵勇扼要築營並添搭浮橋連日更番疊進誘賊出



巢道州四面皆河城中糧食甚少我軍如能嚴  
密圍守使其不能復竄可期不戰自斃惟和春  
等僅能扼賊東北兩面其西南路通粵西之全  
灌及湖南之永明江華現在劉長清等兵勇難  
期得力而南面水南路通甯遠一處尤爲緊要  
副將鄧紹良所帶鎮筸兵八百名楚捷各勇亦  
有千餘如再添兵二千卽於水南駐紮可資堵

截其甯遠縣城又須添兵防守現在飛咨湖廣  
督臣程喬采酌撥兵勇二三千名由甯遠前來  
幫同鄧紹良等兵分紮甯遠及水南二處似此  
布置該逆旣不能竄越再嚴斷其接濟然後相  
機進剿賊自無所逞其伎倆勞崇光已由永州  
回粵臣於二十五日卽由桂林統帶文武弁兵  
起程前赴永州就近督剿再軍前兵勇力圖圍

攻實已單薄前調四川督標等兵到營未甚得力請改於松潘建昌挑選勁兵二千備調此項川兵如程喬采尙未調來卽令其指調松潘建昌挑備之兵其前所挑二千名毋庸再調至此次湖南已調之江西兵二千名湖北省又調陝西兵一千名河南兵二千名必須陸續派赴軍前就近圍剿方期得力若在湖南北等處地方

遙爲防堵非惟各處紛紛請兵駐守兵力斷難  
徧給且軍前合勦兵單不能扼賊四竄各處毗  
連郡邑尤爲防不勝防奏入

上命軍機大臣傳諭賽尙阿程喬采曰據賽尙阿奏稱  
嚴斷接濟一節最關緊要昨已諭令程喬采認真查  
察該大臣現已馳抵永州著卽將目前防勦事宜會  
商妥辦道州城外各險隘現尙被賊占踞務卽嚴飭

鎮將先將各險隘攻破撤其藩籬使該逆株守孤城  
庶可聚而殲旃四川前調之兵業已起程未便復令  
折回抽換其松潘建昌二鎮續調官兵並湖南湖北  
添調新兵卽著賽尙阿程喬采酌量情形隨時飛調  
或撥赴軍前或酌留防守一切機宜朕亦不爲遙制

賽尙阿又奏言臣前奉

諭旨飭令徐廣縉來西會同辦理刻下前路軍情緊切

徐廣縉雖已咨明由高州起程未知何日始到  
臣不敢稽遲現卽馳赴永州力籌督勦惟大局  
所關不得不熟計詳陳徐廣縉馳抵桂林之日  
或令在廣西專辦防勦事宜其

旨將

欽差大臣關防歸臣專管在湖南辦理軍務抑遵前  
欽差大臣關防移交徐廣縉令其馳赴軍前伏祈

綸音明降以便遵行總期事權歸一方於軍務

國事有裨若臣與徐廣縉各駐楚粵仍復會同辦理一切轉多牽制奏入

上諭內閣曰現在粵匪竄踞道州湖南軍務緊要著賽尙阿卽帶欽差大臣關防扼要駐紮會同程喬采籌辦防勦事宜相機調度勞崇光已回廣西徐廣縉亦經馳抵梧州所有廣西軍務卽著徐廣縉會同勞崇

光接辦

同日徐廣縉奏言查道州至恭城富川賀縣皆  
較連州陽山爲近路亦較平現據右江道張敬  
修稟稱已於五月初二日管帶兵勇馳赴恭城  
防禦惟富川賀縣尙覺空虛賊若折回則東西  
兩省之富賀開廣等處均爲喫重臣現抵肇慶  
刻卽馳往梧州相機調度奏入



上命軍機大臣傳諭徐廣縉勞崇光曰廣西大股逆匪現雖竄越湖南而本境零星土匪尙未淨盡波山艇匪勢尤猖獗徐廣縉現已馳抵粵西所有該省堵剿各事宜卽責成該督會同勞崇光妥辦其湖南軍務已飭令賽尙阿會同程喬采辦理矣現在道州賊匪被剿緊急難保不復竄廣西卽廣西未淨之匪與廣東毗連湖南處所亦難保不與道州賊匪暗相勾結

該督統轄兩省於楚粵交界地方務須嚴密防守以杜賊匪分竄向榮現旣稱病其提督事務暫令馬龍代辦究竟該提督病勢如何該督卽察看具奏

十三日壬辰賽尙阿奏言臣於六月初一日馳抵

永州府城疊據和春稟報道州東北路通永州府城及甯遠縣東南亦通甯遠西通江華永明及粵西全州灌陽必須四面圍定方能進剿該

總兵現紮北面可以兼顧東面其西南兩面必須增兵進紮臣先經飭令劉長清帶領粵西兵一千餘名由粵之富川取道永明以達道州西路和春復派撥四川官兵一千九百餘名川勇一百七十餘名統交劉長清帶領前往道州西路各隘口擇要紮營臣因賊蹤去粵較遠又將留守桂林省城之楚兵八百名派守備米興朝

帶領由灌陽前赴道州會合計西面兵力已不  
爲單足當此路堵剿道州南路緊接甯遠隘口  
甚多如藍山新田常甯衡陽處處可通且衡郡  
爲省城門戶一經竄越所關甚鉅是甯遠實爲  
保障衡長第一要隘而由甯遠走新田縣又有  
間道徑達永州欲保甯遠必先嚴堵水南鄧紹  
良兵勇防守該縣實虞單薄未便令其進堵水

南和春現以此路空虛未有大兵堵禦恐攻偏太緊該逆從此竄逸臣當卽函商程喬采於衡永等處撥兵二三千名派員由此路前進以成圍剿之勢旋據咨覆調派苗兵千名交鄧紹良管帶又挑衡州防兵六百名派總兵王家琳帶由常甯新田前進臣到永州後卽將留守永州之湖南兵撥出六百名交鄧紹良管帶連鄧紹

良原帶之楚兵八百名楚勇七百名一併由甯  
遠進紮偏近水南相機堵禦惟聞賊匪强悍者  
多在水南盤踞深慮其專由此路衝突我兵力  
單仍俟新調江西官兵到時再抽撥一千名前  
往會合以厚兵力其甯遠城守緊要臣委派總  
兵孫應照留兵防守俾鄧紹良帶兵前進臣現  
抵永州軍務一切可與程喬采就近籌商奏入

上是之

十七日丙申台湧奏言臣此次管帶滿營官兵在

荊州府屬防堵係帶印信前往茲將滿營官兵  
抽回歸營所有將軍印信是否委員署理抑係  
留帶行營請

旨遵行奏入

上諭內閣曰台湧現辦防堵事宜荊州將軍印信著卽

帶往行營毋庸派員署理

台湧又奏言臣於五月十三日督同荆宜施道  
文輝起程二十二日出荆河口沿江周視酌量  
設防安設戰船礮臺惟白螺磯在楊林磯之南  
係出湖達江要隘臣駐此紮營可以首尾相應  
虎渡爲南北兩省水陸總口令文輝赴彼分紮  
堵禦上游一帶共用官兵一千餘員名現已陸



聞

續到齊派往各處分堵奏入報

同日程喬采奏言查勞崇光業經回粵接任賽  
尙阿亦於六月初一日駐紮永郡粵匪占踞道  
州現無他竄之意聞於附城要隘豎柵立營臣  
咨催和春趕緊進剿竊稟道州地勢平坦四面  
皆河城內米糧亦少如能層層圍住斷其接濟

使其不能復竄定可一鼓成功惟軍營兵勇祇能顧及東北兩面其西面業有劉長清等兵勇分由富川永明灌陽恭城而來南面尙屬空虛請再於衡永防兵內酌撥會剿等情臣接賽尙阿咨現派副將鄧紹良統帶兵勇三千七百餘名進紮水南並委總兵孫應照帶領兵勇一千二百名鎮守甯遠以爲南路屏蔽江西官兵不

日可到現亦飛檄嚴催派撥前往一俟大兵雲  
集定可四面兜圍至糧餉爲行軍要務現赴道  
州攻勦之兵勇無論楚是粵一切鹽糧仍由  
粵局供支其在楚原防兵勇暨續調官兵則由  
楚局支應似此各專責成辦理尙爲周妥臣思  
逆氛雖竄楚疆一切支銷仍歸粵員承辦前此  
截留軍餉北南兩省均因兵勇續增需用愈繁

先行借動其餘收儲銀兩仍分批趕行解往粵  
西藉資應用計南省已奉撥銀一百五十萬兩  
北省亦奉撥銀三十萬兩尤應彼此通融臣當  
體察情形如該省稍形支絀亦卽將借用之款  
照數撥還奏入

上命軍機大臣傳諭賽尙阿程喬采曰賊匪占踞道州  
於附城要隘豎柵立營雖尙無他竄之意而賊情詭

諸難保不分遣匪徒潛赴各屬勾結伺隙竄擾賽尙  
阿現已馳抵永州務當嚴飭帶兵大員及地方文武  
合力進攻仍飭各屬密拏奸細確探賊情並激勵紳  
民搜緝匪黨互相保護或約爲內應乘其不備一鼓  
殲擒道州地勢平坦四面皆河米糧亦少果能於水  
路要隘嚴斷接濟賊勢豈能持久南路空虛現已調  
撥各兵三千七百餘名進紮水南並委總兵孫應照

帶領兵勇一千二百名鎮守甯遠兵力已不爲單弱  
惟孫應照能否得力堪爲南路屏蔽仍須隨時察看  
勿致貽誤至糧餉爲行軍要務督辦須專責成現赴  
道州攻勦之兵勇無論楚是粵一切鹽糧仍由粵  
局供支其在楚原防兵勇暨續調官兵卽由楚局支  
應以歸畫一面免混淆

程喬采又奏言臣接准賽尙阿函稱大營四面

圍攻兵力尙形單薄四川松潘建昌二鎮之兵  
本係奏請豫備仍應指調臣卽趕緊飛咨惟據  
稱前所挑備川兵二千名似可毋庸調取臣查  
此項官兵計期早已在途如復檄令回川未免  
徒滋勞費且江西兵本爲保護長沙省城之用  
今旣派往道州卽以此兵留駐長沙亦足藉資  
捍衛又湖北省前調河南陝西兵三千名現准

賽尙阿來咨亦囑派赴軍前臣思此精銳之師  
僅作留防轉覺投閒置散自應令其合力攻剿  
以期及早成功

程喬采又奏言湖北地方現距賊氛尙遠但水  
則重湖浩淼陸則山路紛歧自宜未雨綢繆以  
期有備無患台湧現已酌帶官兵駐守監利縣  
屬之楊林磯嚴防水路提臣博勒恭武擬紮蒲



圻爲陸路先行設備惟水陸難於兼顧臣查岳  
州府在長沙下游直達武昌提臣如移紮該郡  
布置防維不但與台湧僅隔一江聲勢可期聯  
絡且與臣所派巡防巴陵縣城陵磯之兵亦足  
互相應援

同日駱秉章奏言粵西逆匪現踞道州督臣程  
喬采以新田甯遠等縣皆居道州下游防兵甚

爲單薄咨臣將調省江西兵分撥一千名同前  
調苗兵一千名撥赴甯遠新田分駐堵守以防  
該匪北竄指日大兵進攻道州誠恐各屬尙有  
應須添兵之處省城防兵現止一千數百名難  
再抽撥臣已咨商督臣添調鎮筸鎮官兵五百  
名苗兵一千名聽候調遣臣仍隨時查察相機  
籌辦總期有備無患不敢稍事疏忽均奏入報

聞

同日

上諭內閣曰革職拏問之前任湖南提督余萬清遊擊  
瞿我謙道州知州王揆一前經降旨交程喬采審辦  
現在賽尙阿已抵永州著交賽尙阿會同程喬采將  
該革員等嚴行審訊按律定擬具奏

二十二日

辛丑

廣西巡撫勞崇光奏言臣自永州

回抵桂林賽尙阿卽於五月二十五日由桂林  
移紮永州督辦臣自應留駐省城鎮壓似可毋  
庸出省應援查道州在永州之東南相距粵西  
桂林平樂兩府屬之恭城富川賀縣灌陽興安  
全州均祇一二百里處處有徑路可達省城均  
應嚴加備禦臣在永州時先經函商賽尙阿派  
令總兵劉長清道員張敬修知府顧諧庚帶領

兵勇分赴灌陽之文墟恭城之龍虎關富川之  
麥嶺扼要嚴防仍相機前進剿堵兼施臣回粵  
後又經嚴飭各該地方官雇勇集團以助聲勢  
至桂林省城解圍雖經兩月羣情尙復驚疑現  
將派赴各處之省標官兵次第撤回並將留防  
省城之壯勇逐加挑選留其精銳撥令於城廂  
內外擇要分紮務使巡哨嚴明聲勢聯絡再揀

選各鄉團精壯練丁三四千名於城外稍遠各要路分布紮營嚴密防範仍隨時察看情形如果兵力尙單卽將近省各協營官兵酌量抽調來省協防一面剴切出示以定人心激勵團練以作民氣招撫流亡以復民業訓練兵勇以肅軍紀搜緝土匪以靖內奸日來民間已漸安堵柳慶鬱林各府州屬游匪土匪不時蠢動起滅

無常各屬每遇寇警卽紛紛請派大兵無如各省客兵均已陸續趕赴楚省大營本省額兵止有此數實難處處分撥惟有飭令多雇壯勇鼓舞團練以資捍衛而供援剿梧州艇匪擾及潯州貴縣尤爲恣肆節經前撫臣及臣派兵剿捕督臣徐廣縉復派高廉道沈棣輝管帶兵勇由北流興業一路進剿臣又飛飭知府黃輔相馳

至橫州齊團堵截使該匪不敢上竄各路兵勇  
現已齊抵潯州徐廣縉復親駐梧州督辦定可  
剋期殄滅再前次留防桂林省城之楚兵僅餘  
八百名臣到任後已面商賽尙阿派赴劉長清  
營盤與該鎮原帶粵西兵一千餘名合爲一隊  
由富川前赴湖南奏入

上命軍機大臣傳諭勞崇光徐廣縉曰道州距恭城富



川賀縣灌陽興安全州等州縣均祇一二百里處處有徑路可通省城自應加意防堵所有分布兵勇團練各事宜俱著照議妥辦至柳州慶遠鬱林各屬游匪土匪不時竊發勢難紛紛派兵防剿卽著密飭各該管道府州隨時偵緝仍令實力團練以資捍衛波山艇匪經徐廣縉親督兩省文武合力搜捕定可卽日悉數殲擒該督於竣事後卽行馳赴桂林與勞崇

光會籌一切嚴堵要隘毋令逆賊竄回賽尙阿現已  
移紮永州所有廣西軍務卽由該督撫悉心會議商  
辦其有關涉楚省事務隨時咨明賽尙阿行營庶可  
不致歧誤提督向榮在桂林稱病累月竟將公事諉  
之代理殊屬不成事體著該督傳旨飭令接印任事  
毋得藉詞觀望致干重咎

二十八日

丁未

徐廣縉奏言遵查吳文鎔張亮基

原片內稱賊由新墟竄出向榮首先遁入平南  
蒙

皇上不殺之恩許其帶罪立功乃猶託病偃蹇月餘不  
出迨賊踞永安向榮復赴營視事總統北路全  
軍並未聞破一賊營擒一賊目又由永安追賊  
不審機宜遇賊敗衄誠如雲南督撫臣所言惟  
查此兩次挫頓曾經大學士臣賽尙阿叅奏恭

奉

嚴旨予以處分似可毋庸再議至謂向榮帶領殘兵數十名躲入省城自保及捏稱統帶大兵閒道赴援一節查逆匪攻撲桂林實由賽尙阿飛派向榮赴援該提臣帶領親兵數十人由閒道先行馳入省城大兵隨後趕到逆匪圍攻文昌門最急向榮獨守此門其親兵皆有中礮傷亡者該

提臣指揮備禦始克保全此廣西人士所共見  
共聞平情而論新墟古東兩戰損兵折將之罪  
固不容寬而馳援桂林捍衛保障之功亦不可  
掩現在向榮在省養病臣在高州詢之總兵福  
興知其素有氣痛之證想因守城積勞舊病復  
發似尙非託故遷延相應請

旨嚴飭向榮激發天良力除惡習仰體棄瑕錄用之

聞

厚恩勉圖報效至向榮在今日諸將中似尙可供驅策  
奏入報

同日龔裕奏言 臣近接督臣程喬采咨粵匪占  
踞道州現經各路官兵合圍衡永兩郡要隘業  
已分派兵勇嚴防湖北地方亦應未雨綢繆使  
賊知我有備不敢竄越其前調陝西河南兵三

千名自應馳赴軍前進剿隨值副將高峻統領  
河南兵一千名陸續行抵湖北省城臣卽飭令  
於六月初十十一等日由湖南巴陵前進至陝  
西兵二千名一俟行抵楚境亦卽催赴軍營所  
有湖北應辦防堵地方將軍台湧現在監利縣  
屬之楊林磯水路駐紮提臣博勒恭武在臣前  
調湖北兵一千八百三十名內揀帶將備領兵

聞

一千三百餘名至湖南岳州查看形勢分別設  
防仍留兵五百餘名派員管帶在上達洞庭下  
通武昌之金口淮山大軍山駐紮巡守以昭周  
密奏入報



欽定勦平粵匪方略卷十五 壬子年

七月初三日

辛亥

徐廣縉奏言逆匪竄踞道州後

於六月初八日分夥二千餘人忽入湖南江華

縣境勢將南竄查江華與廣東之連州陽山廣

西之富川賀縣毗連而賀縣地面無重兵防堵

尤爲可慮現先將臣隨營潮勇一千名委員帶

往駐守所有前派在潯州兵勇已飛飭高廉道

沈棣輝督帶迅來梧州酌量撥往富賀兵力稍厚庶可不致疏虞廣西一省糜爛已久伏戎徧地又有散遣各處壯勇沿途滋擾惟有設法次第翦除以冀肅清邊圉奏入

上命軍機大臣傳諭徐廣縉勞崇光曰道州逆匪於六月初八日分夥二千餘人入湖南江華縣境該縣與廣東之連州陽山廣西之富川賀縣俱相毗連防堵

尤關緊要該督先經派委員弁管帶潮勇一千名扼要駐守現復飛飭高廉道沈棣輝迅赴梧州酌撥兵勇前往嚴防著徐廣縉會同勞崇光向榮卽飭令將弁兵勇前往富賀一帶遏賊回竄之路或乘勢直抵江華縣境與湖南將弁腹背夾攻殲除竄匪則道州逆匪亦必聞而膽落其廣西游匪土匪與散遣兵勇沿途滋擾均宜次第勦捕著徐廣縉等飭令各府屬

督同練勇迅速掃除

上又命軍機大臣傳諭賽尙阿程喬采曰據徐廣縉奏稱六月初八日該逆分夥二千餘人已入江華縣境勢將南竄其如何突圍出走情形未據該大臣等馳奏朕心懸念實深江華與廣西富川賀縣接界一經竄回賊燄必將復熾本日已諭知徐廣縉派員馳赴該處防堵該匪大隊是否尙踞道州既有竄逸之衆

難保不四出衝突窺伺衡湘是東北各路尤爲緊要  
孫應照鎮守甯遠如不得力該大臣等卽隨時酌度  
情形密籌援應萬不可稍有疏虞致衡永兩郡繹騷  
震驚也

同日勞崇光奏言臣於六月初九日接據署馬  
平縣知縣李燦稟稱初二日有外來土匪一千  
餘人攜帶礮械在縣境四都大發一帶滋擾臣

當卽飛調慶遠協官兵二百名融懷營官兵一百名並由省派員管帶川勇二百名兼程馳赴會剿茲於六月十五日接據代理柳州府知府羅福杲稟報該匪糾集人數甚多勢益猖獗初十日夜直撲營盤官兵整隊出敵擊斃賊匪數百餘名因衆寡不敵署知縣李燦署守備舒曾謨在喇堡地方力竭被害查土匪聚衆搶劫經

官兵往捕膽敢添糾匪黨拒敵戕官實屬罪大  
惡極亟應迅速殲除免致勾結爲患臣與提臣  
向榮熟商又由省城添派守備甘鍾棠千總萬  
明魁等統帶兵勇一千六百名審度機宜奮勇  
勦洗務將此股賊匪悉數埽除勿留餘孽所有  
陣亡之署馬平縣事准補修仁縣知縣李燦署  
左江鎮標右營守備事中營千總舒曾謨勦捕

賊匪力竭捐軀深堪憫惻應請交部從優議卹  
奏八

上諭內閣曰廣西馬平縣土匪攜帶礮械在縣境四都  
大發一帶地方滋擾經該署知縣李燦會同營員帶  
領兵勇往剿在喇堡地方力竭被害此股土匪突起  
滋擾拒捕戕官殊堪髮指著徐廣縉勞崇光督飭派  
往員弁並地方文武各員合力剿洗務將戕官各犯



按名拏獲匪黨悉數殲擒所有陣亡之署馬平縣事  
准補修仁縣知縣李燦署左江鎮標右營守備事中  
營千總舒曾謨均著交部從優議卹其現無下落各  
員弁及傷亡兵勇均著確查覈辦

初五日丑癸賽尙阿程喬采奏言臣賽尙阿於六

月初一日馳抵永州體察地勢賊情知賊自竄  
越楚境各處土匪響應者轉較粵西爲多道州

四面賊踞而州城附近地皆平坦我軍圍剿難  
周一俟抽調新兵陸續到來兵力加厚然後可  
以銳力圍攻而道州四達之衢東北面係通衡  
永正路和春等大營兵力稍厚前已分出兵勇  
二千餘名交劉長清會合所帶粵兵提勇等專  
紮西路現又分出楚滇兵提勇等六千餘名交  
常祿帶領與鄧紹良等兵勇由甯遠進紮南路

初八日賊匪突出千餘由岑江渡竄走係往江華之路和春當卽會督鎮將派兵出隊於五里亭一帶施放槍礮該逆出巢迎敵與我兵相持甚久始復退回又據江華縣逃出弁兵人等報稱初八日逆匪分股詐稱潮勇闖入江華縣城約數百人城內僅有永綏防兵及壯勇三百名永州鎮標遊擊秦武林永綏協千總王士凱督

同弁兵急開槍礮迎敵秦武林左腳爲賊矛傷  
江華縣知縣劉興桓被害室妾同時自盡等語  
臣等查永明切近江華刻下情形危急當由臣  
賽尙阿飭和春派劉長清迅帶兵勇馳由永明  
赴江華援剿並於永明留兵數百以固城守現  
據和春稟覆劉長清已奉飭前往且派定南路  
兵勇由常祿統帶於本月十一日移營由白馬

渡過河分兵三路進攻並於五里亭樹林內設  
伏以爲後應和春督率兵勇先開槍礮誘賊出  
巢該逆旋出二三千人分兩路撲來勢甚猛惡  
總兵經文岱李瑞秦定三王錦繡候補同知直  
隸州江忠源各帶兵勇亦分兩路迎擊和春居  
中調度槍礮連環進擊各路兵勇合力夾攻該  
逆敗走常祿等所帶兵勇卽於是日移營南路

十四日和春仍分成出隊先於五里亭開礮誘賊該逆伏匿不出我兵漸偪漸近槍礮齊發斃賊多名該逆擁出千餘人我兵奮力壓下又斃賊數十名等語臣等查道州四路紛歧我兵不敷攻勦而該逆乘虛竄由西路徑撲江華勾連土匪以致縣城失陷臣賽尙阿程喬采均未能先事豫防臣駱秉章亦有地方之責均請

旨交部議處江華縣知縣劉興桓於縣城失陷臨難捐軀深堪嘉憫應俟將在城官弁查明一併奏請恩卹其遊擊秦武林以拒賊身受重傷是否屬實已飭由江藍廳同知就近查驗並確查該員有無臨陣退避及藉詞遁出各情報明辦理仍一面檄催江西河南陝西四川各省續調新兵星速前進庶幾兵力厚集得以迅速蒞功

賽尙阿程喬采又奏言據永明縣知縣常連稟  
稱本月十三日夜賊匪千餘由江華道州兩路  
直撲永明縣城失守劉長清隨帶兵勇往紮富  
川縣交界臣等查江華失守後永明情勢危急  
專委該革鎮劉長清帶兵由永明前往援剿原  
以兼顧該縣城守該革鎮帶兵行抵該縣地方  
已聞城池被陷卽當乘勢進攻以圖克復乃繞



赴鄰縣地方坐視城池失守轉於遠處紮營實屬畏葸無能相應請

旨將已革總兵劉長清拏問飭解永州嚴訊辦理臣賽尙阿督領全師調度失宜應請

旨交部議處提督銜總兵和春北路堵剿未能先事妥籌應請

旨併交部議處現已派弁持令嚴催劉長清所統副

將明安泰遊擊蕭逢春都司米興朝等管帶川  
粵湖南官兵迅速前赴江永一帶剿匪總兵馬  
龍現在廣西省城業由臣賽尙阿飛札調由恭  
城取道永明接統劉長清兵勇俾資進剿並可  
堵截逆匪分竄之路刻下逆匪大夥尙在道州  
城內仍嚴飭和春常祿等極力攻剿至永明縣  
常連所稟劉長清種種引避情節如果屬實必

當從嚴懲辦惟該令常連係守土之官是否藉  
詞請兵擅離城守亦須確切查訊應請將常連  
一併革職拏問俟劉長清解到提同質審明確  
按律定擬

賽尙阿又奏言廣西柳州鬱林慶遠思恩各府  
州屬匪徒滋擾現尙未能殲除臣業經馳抵湖  
南永州於粵西事屬隔省難以兼顧當將各屬

稟報移咨廣西巡撫自行專辦其應奏明各件  
查照臣五月初四日奏單開列以後情形卽由  
該撫查明具奏所有在事出力文武官紳並臣  
厯次所奏勦辦各股出力人等會奉

旨保奏未經查覈具奏者均應由該撫臣查明辦理以  
歸畫一而免歧誤奏入

上命軍機大臣傳諭賽尙阿程喬采曰逆匪竄踞道州

以來各處土匪多爲勾結現旣分股撲入江華永明  
二縣勢必四出衝突其南竄廣西之路固應嚴防而  
北路衡永一帶尤關緊要著賽尙阿程喬采督飭帶  
兵各員於水陸要隘層層布置嚴密堵截毋稍大意  
提督向榮前已有旨飭令任事如永州一帶情形緊  
急有須該提督帶兵協剿之處著賽尙阿酌量札調  
廣西提督印務卽咨會徐廣縉派員署理所有續調

各省官兵著卽飛催來楚粵西剿捕事宜前已諭令  
徐廣縉勞崇光會同商辦以專委任所有賽尙阿經  
手未完各事及歷次保奏未經查覆者均著徐廣縉  
勞崇光詳細確查奏明分別辦理其有交涉楚粵兩  
省事務仍隨時互相知照以免歧誤

又命軍機大臣傳諭王懿德曰前據季芝昌奏遵旨  
挑選精兵派統領管帶各員聽候咨調現在賊踞道

州仍須添調重兵以資堵剿著王懿德卽飭前派鎮將等員統帶泉州漳州汀州等營精兵三千名迅速分起由廣東一路前赴湖南軍營聽候賽尙阿程喬采調遣毋稍遲誤

上諭內閣曰逆匪於旬日之間連陷江華永明兩城地方文武何以毫無準備帶兵大員何以不急籌援救且江華失守後劉長清帶兵已抵永明正當乘勢進

攻乃繞赴遠處紮營實出情理之外已革總兵劉長清著卽拏問永明縣知縣常連係守土之官輒以請兵爲辭擅離職守著一併革職拏問交賽尙阿程喬采嚴訊定擬具奏賽尙阿程喬采及駱秉章均著交部議處和春在北路堵剿雖分兵令劉長清援應究未能先事妥籌著一併交部議處該大臣等現已札調總兵馬龍帶兵由恭城取道永明並派副將門安



泰等帶領川粵各兵前赴永明一帶進剿著卽嚴飭  
各鎮將奮勇攻擊迅圖克復勿令賊匪再有蔓延江  
華縣知縣劉興桓臨難捐軀室妾同時自盡殊堪憫  
惻著交部照例賜卹其餘殉難員弁著查明請卹

十一日己未徐廣縉葉名琛奏言羅鏡逆匪渡十

八負嵎抗拒六月初一初二等日經總兵福興  
等派隊進剿計斃匪夥十五名生擒九十五名

嗣探得逆匪之弟凌二十八住宿鬼子埕礮臺  
時值四更卽令嚮導先行兵勇一路隨入徑登  
礮臺擒斬二名凌二十八受傷敗走福興等於  
初八日夜復遣兵勇帶同眼綫齊抵該處將全  
軍分作三層共爲十五隊星羅碁布宗元醇進  
駐南門彭舒萼吳昌壽進駐椽子山李敦業進  
駐石皮灣天將黎明卽分東西中三路齊撲入

墟我軍勇氣百倍都司姚麟督帶外委戴文英  
等由岡頭寨至鬼子埕攻破礮臺七座放火焚  
燒首先入墟該逆凌十八跳入塘內渡水直奔  
勇目馮日坤等越過短牆乘勢將凌逆首級砍  
落外委戴文英等生擒造言煽惑商同謀逆之  
犯婦陳葉氏一名焚燒榕樹根等處礮臺二座  
凌二十八由礮眼突出經兵勇割取首級候選

千總孔繼堯等力闢險要各隘直擣中堅焚燒  
礮臺十二座斬擒甚衆各營弁兵繼入西壚生  
擒逆犯之父凌五超一名分路進攻破壁直入  
擒殺無算東路派委都司黃曜吉等率同壯勇  
攻破東壚口外礮臺首先入壚賊之頭目凌十  
三張城蔥黃非濫彭位篤羅萬勝張蕪詳黃明  
受莫汝篤李汶盛葉林生梁起汝均已一併生

擒是役也自丑至午東西兩路生擒匪犯二百六十八名呈驗首級一百六十七顆並殲斃一千一百餘名焚斃屍身約有八百餘具奪獲槍礮器械無數查凌十八自道光二十九年卽在廣西金田地方拜上帝會往來信宜蹤跡靡定係著名會匪與洪秀泉等同惡相濟擾及兩省荼毒良善此股旣除縱有不逞之徒皆已膽寒

骨慄至總兵福興親臨督陣正值風雨交加之  
會躍馬直入賊巢墜地墊傷仍復力疾前進洵  
屬謀勇兼施所有在事各文武相持一年之久  
前後幾及百戰殲擒六千有奇卒能同心協力  
滅此兇頑尙各著有微勞容俟 臣等確切查明  
再行據實保奏至於各會匪起於金田迫分股  
竄出後其勢已成本屬力不能制經過各該州

縣尙能嬰城固守力保無虞及大兵雲集又復  
協同堵剿所有該管地方文武功過似可准其  
相抵請免置議奏入

上諭曰卿等鞠躬盡瘁晝夜籌剿得以掃數殲除皆卿  
等力也覽奏深慰朕懷

上諭內閣曰羅鏡浚十八股匪黨衆心堅擾及兩省抗  
拒一年之久實屬罪大惡極經該督撫等先後籌剿

不遺餘力得以埽數殲擒洵足伸國法而快人心徐  
廣緝督辦最久厥功甚偉著加恩賞加太子太保銜  
仍交部從優議敘葉名琛接辦後調度有方全股一  
舉蕩平州境肅清地方安堵如常辦理甚屬妥速加  
恩賞加總督銜仍交部從優議敘所有在事出力各  
文武首尾一年前後幾及百戰殲擒六千有奇皆能  
同心協力滅此兇頑洵屬著有勞績著卽確切查明



據實保奏候朕施恩至該匪起自粵西竄入東省各  
州縣尙能保守城池又復協同堵剿所有該管地方  
文武官功過尙足相抵著免其置議

十二日

庚申

上命軍機大臣傳諭徐廣縉葉名琛曰現在道州逆匪  
分擾江華永明賊勢日熾所有羅鏡軍營弁兵除應  
酌留若干搜查餘匪外著徐廣縉葉名琛迅即選派

得力將弁馳往湖南軍營協同圍剿總兵福興能否  
飭令統兵前往並著酌量派委仍咨明賽尙阿程喬  
采查照調遣

十三日 辛酉 賽尙阿程喬采奏言六月十五十六

至二十三十四等日常祿和春等由五里亭龍安  
橋兩家鋪節節進剿斃賊無數二十五日和春  
督率兵勇並約西南兩路進攻道州北路直偏

賊營賊仍不出官軍分三路環攻忽於二十五  
日夜三更賊由州城乘夜竄由四眼橋小路全  
數遁逃查四眼橋係道州至甯遠藍山之路並  
可通永州郡城和春刻卽拔營進剿知會常祿  
立卽帶兵前截後追並派鄧紹良瞿騰龍等兵  
勇星馳繞赴四眼橋前路並護甯遠縣城旋據  
總兵孫應照甯遠縣知縣劉如玉等稟賊由四

眼橋竄至該縣之水打鋪鄧紹良兵勇趕至天堂墟賊不敢近偏縣城竄往下灌和春帶兵追賊至司馬星地方仍卽拔營前進一路擒獲賊匪數十名立卽訊明斬首又據探報永明縣逆匪業已遁走江華賊匪亦回至水南兩縣城賊無多和春已札催明安泰虎嵩林等督帶兵勇速赴該兩縣相機收復此次和春及鄧紹良

騰龍等追兵尙屬迅速賊已不敢窺伺甯遠徑  
由水打鋪前竄下灌地方屯紮查下灌路通嘉  
禾藍山賊蹤現在游弋靡常各路均須備禦臣  
賽尙阿飛札鄂紹良瞿騰龍等迅由甯遠馳赴  
嘉禾明安泰軍迅由江華馳赴藍山兩處堵剿  
賊如再從兩縣越過則郴桂所屬及常甯新田  
各皆喫緊亦飭該將等隨時探明繞前堵截臣

賽尙阿現駐永州府城臣程喬采現在衡州足資鎮壓該處爲通省咽喉地方尤爲緊要擬將續到新兵暫留以振軍威隨時探聽賊蹤指撥防剿查此次賊之分股由江永遁歸道州實係和春常祿南北兩路進剿嚴緊賊勢難支始由小路全股鋌竄惟七里江四眼橋係屬南路應由常祿分兵駐守賊旣由此夜竄臣等未便因

其疊獲勝仗稍事姑容應請

旨將總兵常祿交部議處奏入

上命軍機大臣傳諭賽尙阿程喬采曰逆匪占踞道州並分擾江華永明二縣牽掣我軍經該大臣等嚴飭和春常祿等併力進攻緊逼州城疊獲勝仗該匪乘夜奔逃該大臣現已札飭鄧紹良等跟蹤追剿前後夾擊布置尙爲周妥惟賊蹤靡定詭譎異常難保不

再從嘉禾藍山越過東竄郴桂等屬爲北竄衡州之計該大臣等務當督飭各鎮將於水陸要隘設伏嚴防毋令伺隙奔竄衡州爲省垣屏障程喬采駐紮該郡人心所繫不可稍有搖動尤須嚴飭文武兵勇加意防守省垣重地亦須鎮靜彈壓嚴密守禦該大臣駐守永州足壯聲威趁此賊勢渙散之時嚴飭各路帶兵大員合力兜剿前截後追庶可一鼓蕩平至副



將瞿騰龍鄧紹良守禦最爲出力何以此次保舉單內未經列入或因三月間鄧紹良已得優敘瞿騰龍已賞勇號不須再保耶著查明覆奏

上諭內閣曰逆匪竄踞道州我兵四面攻勦自六月十五日以後總兵常祿等疊次攻擊連獲勝仗賊勢不支遂於二十五日夜逃出州城由四眼橋小路全數遁逸其永明江華賊股亦於二十三四五日棄城遁

走回至水南欲圖併力奔竄我軍追捕迅速該逆不敢窺伺甯遠徑由水打鋪竄往下灌地方屯聚游弋賽尙阿現已札飭鄧紹良瞿騰龍等分路堵剿郴桂一帶亦飭一律堵截著賽尙阿等嚴督將士及各地方文武員弁合力兜剿一鼓殲擒毋得再任擾竄城池致滋勾結此次賊由小路竄出係屬總兵常祿分兵駐守之所咎實難辭常祿著交部議處

同日湖北巡撫常大瀉奏言臣籍隸湖南衡州府由南省至北省一路形勝皆所親歷上游永州衡州二府水陸關隘爲長沙省城屏障其長沙下游之岳州府接壤北省水陸要隘實爲湖北全省屏障是以議保湖北必守岳州現在粵匪占踞道州分出肆擾若被攻窮蹙難保不冒險竄越則岳州要口自應豫爲籌備嚴密北省

方可無虞但該處水陸形勢須得本地紳民團練壯丁籌防相助方爲得力臣素知該處有在籍紳士吳巽行方宗鈞等俱有膽識才略爲郡屬紳民所信服洞庭湖中業漁船隻不下數千俱可隨地編查爲臨時雇募之用惟沿湖如何設卡戰守如何練習何人分領其任經費如何籌備必須臣親往察看與該紳士等導以桑梓

之義面爲商推並督同該府縣立定章程以備  
臨時指使若僅委員前往查辦卽難免官民情  
隔空言無濟臣擬於七月初間酌帶明幹委員  
前赴岳州辦理此事奏入

上命軍機大臣傳諭常大瀉曰據奏湖南岳州府爲湖  
北全省屏障現擬親赴該處查看情形督同府縣及  
紳士等籌備防堵酌定章程等語兩湖交界地方犬

牙相錯自應不分畛域扼要嚴防據稱岳州紳士吳  
巽行方宗鈞等才略可用著卽密向咨詢與地方官  
妥爲布置其由武昌至岳州所過地方水陸各要隘  
應行查看設備之處並著豫爲籌辦毋稍疏虞

十五日

癸亥

徐廣縉奏言臣查江華毗連賀縣永

明偏近富川而富川上接平樂恭城下抵蒼梧  
賀縣地面尤爲扼要臣已札飭高州鎮總兵福

興挑選精銳兵勇二三千名統帶來西該鎮心  
地明白強毅有爲堪資臂助俟其到梧後擬派  
候補知縣胡湘隨同就近將鬱林一帶土匪迅  
速剿滅總期先除本境匪徒庶可於楚粵交界  
之地併力籌辦不致竄後跋前柳州各屬亦有  
匪徒肆擾該處偏近桂林已由撫臣勞崇光派  
兵勦辦

徐廣緒又奏言逆匪竄入楚境粵西追勦兵勇  
二萬餘名所需口糧及雜支等項由廣西派員  
支應在永州設立糧臺每月約需銀三十餘萬  
兩至廣西防堵逆匪回竄並勦捕艇匪及各屬  
土匪一切口糧經費每月亦約需銀三十萬兩  
合計每月共需銀六十餘萬兩其湖南原防兵  
勇及續調官兵則另由楚局支應三處糧臺每



月將及一百萬兩而臣隨營糧臺所需尙不在  
此數

國家經費有常籌撥維艱此時防堵富賀一帶亦  
由臣派撥兵勇前往將來勦辦鬱林等屬土匪  
又皆派東省官兵統由臣隨營之局支應則省  
局所發自可量行裁減以免冒濫且臣自抵梧  
州後察知廣西招募壯丁實皆有名無實官吏

之剋扣紳民之冒領在在皆然臣已移咨撫臣勞崇光確查辦理務使事皆覈實不得任聽局員開報以節軍餉而杜虛糜奏入

上命軍機大臣傳諭徐廣縉曰前諭令徐廣縉葉名琛選派得力將弁管帶獲勝兵勇馳往湖南軍營協同圍剿並諭令酌派總兵福興統兵前往茲據該督奏稱已飭福興統帶精兵二三千名前來廣西就近將

鬱林一帶土匪迅速剿滅自係爲先除本境匪徒並  
資防堵起見惟湖南道州及竄擾江華永明賊匪昨  
據賽尙阿等奏全股東竄徑由水打鋪竄至下灌地  
方屯紮正在郴桂一帶剿辦喫緊之際且恐各省續  
調之兵未能到齊衡永兩郡情形甚爲緊要該督仍  
當悉心體察隨時偵探如楚省急須援應卽酌派福  
興統兵迅由聞道馳往協剿速殄羣醜另片奏量行

裁減省局支應一節所見甚是卽著照所議覈實辦理仍移咨勞崇光確切查覈前辦糧臺官吏紳民等有剋扣冒領等弊卽著從嚴叅辦至湖南軍餉近又請撥三百萬兩已由戶部籌撥一百五十萬其餘另行籌款陸續撥給

十六日

甲子

上諭內閣曰現在湖南軍務未竣賊蹤竄擾靡定各路

帶兵攻勦需材孔亟因思滿漢各營中豈乏材技出  
衆足備干城之選者或因官職較卑限於資格無由  
及時自效殊爲可惜著各該將軍都統督撫等留心  
簡練隨時考察自鎮將以下無論官職大小有謀勇  
兼裕或材力堪任折衝禦侮者卽行據實保奏候朕  
簡用其鄰近湖南省分如保奏之員可資軍營差遣  
卽奏明請旨飭令該員前赴軍營聽候欽差大臣等

酌量委用該將軍等其慎加遴選毋濫毋遺用副朕  
整軍經武之至意

十八日

丙寅

前任湖北巡撫羅繞典奏言

臣奉

命幫辦湖南軍務於六月二十八日行抵省城晤院司

道府各官據報所練壯勇廣勇瀏勇湘勇計三

千二百有零查點均實

臣

適連日聞江華永明

桂陽州嘉禾失守賊匪現由小路紛竄下窺各

處省中紳耆恐賊氛逼近稟留臣在省防禦臣  
思省垣爲根本重地自應先固藩籬因與司道  
共商省城南城及大小西門外等處居民鋪戶  
幾萬千家毫無捍蔽惟有樹建木城徧安槍礮  
其沿江之昭山龍潭灣先已設有木筏守兵並  
礮船數隻橫截江面防賊偷渡但江岸左右山  
徑紛歧更須疊設望樓密派伏兵防截以限賊

三  
蹤數日內與在事官民相度會垣內外情形嚴  
飭擇要速辦務使有備無患奏入報

閏  
十九日  
丁卯

上命軍機大臣傳諭賽尙阿程喬采曰昨據羅繞典奏  
籌商防禦省城南城及大小西門外樹建木城沿江  
之昭山龍潭灣先已設有木筏守兵各等語江華永



明賊匪竄出前經賽尙阿等奏明其桂陽嘉禾兩城如何失守情形未據馳報嘉禾至桂陽僅百里北界衡州儘再任其竄擾衡湘各路帶兵大員所司何事自賊匪竄入楚境各州縣紛紛失守大兵祇能尾追並不能設奇要擊現在賊衆是否占踞城池意圖越過永州大營直窺衡郡我兵如何截剿使賊不敢北竄該大臣等務卽督飭各軍分扼水陸要隘並飭遠

近各郡縣偵獲奸細確訊賊情則剿辦更易得手其  
省城外木城或可禦賊若賊以礮火攻撲豈不轉資  
賊用其木筏一項亦恐運掉不靈賊匪得之適足爲  
梯衝之具果否適用不致貽患均著該大臣等妥籌  
辦理思患豫防

二十四日

壬申

賽尙阿程喬采奏言據和春等稟

報六月二十七日賊由下灌分遣數百人復竄

水打鋪地方二十八日和春親督大兵追至下  
灌常祿等兵至甯遠縣城時賊已於是日早由  
下灌分竄藍山縣之楠木橋地方及嘉禾縣城  
殺傷鄉勇嘉禾失守和春常祿等帶兵跟追沿  
途殺賊數十名二十九日紮營嘉禾縣城外之  
夏門墟初一日和春督同各鎮將兵勇分路進  
攻該逆見我兵將至城下遂開槍礮我兵逼近

城根奪門而入賊猶有數百人執械巷戰殺賊  
一二百名餘匪由北門奔逃我軍追至城外十  
里之西車灣餘賊四散當於西車灣紮營酌留  
楚勇四百名守護縣城搜捕餘匪撫諭居民查  
詢城中文武未知下落常祿之兵行抵新田初  
二日探報行囊墟地方賊衆數百屯紮桂陽州  
城業已被陷初三日和春由旌德橋拔營至距

桂陽州城十里之七里亭賊猶占踞我兵掩至  
殺賊數十名適副將明安泰參將虎嵩林都司  
米興朝等帶領湖南四川官兵趕到合力同追  
直至城下斃賊不計其數該逆復由城內擁出  
約二三千人勢甚兇很我兵連開槍礮該逆數  
次撲來均爲我兵壓下是日鏖戰五時之久先  
後斃賊四百餘名千總馬金柱及幫帶楚勇把

總銀邦光陣亡其餘兵勇亦有傷亡是夜四更  
州城火起和春傳各營兵勇出隊黎明兵勇翻  
越山坡遙見該逆已從東門絡繹前往郴州大  
路探報初三日該逆竄至郴州奪城占踞此次  
賊蹤飄忽旬日之間奔竄數百里我軍節節追  
剿其勢萬難四面合圍猶幸賊至嘉禾桂陽和  
春等大軍緊追奮力剿殺賊衆奔竄兩城旋即

克復臣賽尙阿臣程喬采究屬未能先事豫籌  
臣駱秉章亦有地方之責相應請

旨一併交部議處現在郴州被踞該處地頗豐腴市廛  
屯聚爲廣東入湖南要口距州四十里河面船  
隻甚多一以資賊貽害不淺查該處下游永興  
耒陽皆爲泊船處所臣程喬采已豫飭地方官  
將船隻盡行撤去該州水路自永耒而下直出

耒陽河口卽達衡州下游偏近長沙陸路由永興可走安仁攸縣等屬更可直達長沙臣屢經函囑臣駱秉章於川陝新兵陸續到省時截留保衛其先到永州之江西官兵一千名現已飭令趕赴長沙協同固守以重根本臣賽尙阿卽於十五日由永州移營馳赴衡州與臣程裔采會合一處軍中諸事得以籌商調度並飛咨江



西撫臣於交界嚴防又疊次飛咨廣東督撫臣  
徐廣縉葉名琛於廣東交界嚴防相機派撥兵  
勇以備迎擊其桂陽進剿陣亡之千總馬金柱  
把總銀邦光應請

飭部議卹又銀邦光一員自備資斧投效隨同打仗數  
十餘次實屬奮勇得力今以殺賊臨陣捐軀尤  
堪憫惜仰祈

天恩交部加等照千總例議卹以慰忠魂奏入

上命軍機大臣傳諭賽尙阿程喬采曰逆匪自竄湖南以來勢甚剽悍連陷數城固由土匪到處勾結內應何以各州縣地方官兵旣不能先事偵緝又不能嬰城固守該大臣奉命出征一年有餘厯次奏報軍情不過派兵尾追並未迎頭截擊出奇制勝所謂調度者安在程喬采籌辦防堵爲日已久何以地方文武

毫無布置遇賊撲城竟不能相持數日以待外援耶  
現在賊已越過永郡踞守郴州勢將下竄衡郡竟圖  
長沙似此蔓延滋擾何所底止賽尙阿現赴衡州與  
程喬采會籌防勦若再失機宜自問當得何罪各省  
續調之兵計已到齊衡湘乃楚南門戶最爲緊要該  
大臣等務當通盤籌畫激勵將士分扼要隘趁此賊  
匪喘息未定之時併力夾擊迅掃逆氛其廣東廣西

江西各省交界處所並著隨時知照一體嚴防毋任竄越

上又命軍機大臣傳諭徐廣縉曰逆匪自竄入楚境以來連陷數城雖土匪勾結滋蔓總因督兵大臣調度失宜將弁不能用命所致現在郴州又復失陷被賊屯踞該處地頗豐腴市廛屯聚水陸兩路北通衡州長沙而水路尤爲喫緊賊匪勢甚剽悍意在窺伺衡

湘爲直撲長沙之計賽尙阿自統領大兵以來日久  
無功朕早慮其性情過於慈柔賞罰未能悉當以致  
將弁等日久生玩不肯用命更恐爲賊匪所窺動輒  
中其奸計是以前降旨令該督統兵前赴廣西如賽  
尙阿病體不支卽接受欽差大臣關防專辦軍務及  
該督到梧州而桂林匪徒已竄楚南彼時艇匪正須  
勦洗該督勢難兼顧今潯梧一帶漸次廓清卽各處

不無土匪勞崇光儘可籌辦較之楚匪情形自當先其所急徐廣縉沈毅有爲朕所深悉現在湖南逆燄鷗張情形甚爲喫重已明降諭旨著徐廣縉統兵前往湖南會勦著卽將高州鎮總兵福興所帶得勝之兵數千名迅速統帶馳赴衡州一帶扼要調度毋稍遲延並將此旨宣示賽尙阿卽將欽差大臣關防交徐廣縉祇領軍營及地方文武各員統歸節制該大

臣務當整飭紀律嚴明賞罰以期壁壘一新迅殄羣醜庶釋朕南顧之憂也賽尙阿交卸關防後仍著奏明聽候諭旨至廣西土匪卽責成勞崇光妥爲防勦上又命軍機大臣傳諭葉名琛曰賽尙阿程爾采馳奏賊匪竄踞湖南郴州已有旨諭令徐廣縉由廣西帶兵馳赴湖南會剿所有兩廣總督並欽差大臣關防著葉名琛署理廣東巡撫卽著柏貴暫署楚粵交界

地方防堵緊要該署督務嚴飭提鎮及地方文武員弁隨時偵探扼要設防儻須越境夾擊毋稍拘泥致失事機至廣西湖南兩省軍餉如有緩不濟急之處該署督撫趕緊設法籌備以資撥解

上諭內閣曰賊匪自道州竄出後於六月二十七日由下灌地方擁入嘉禾縣城經和春常祿等分路進攻七月初一日逼近縣城奪門而入賊由北門竄出我



軍追勦賊匪於二十九日分股已入桂陽州城我軍  
於初三日跟蹤追勦該逆全夥竟由桂陽竄出又陷  
郴州該大臣等調度無方實難辭咎賽尙阿程喬采  
均著交部議處駱秉章有地方之責著一併交部議  
處所有勦賊陣亡之千總馬金柱著交部議卹把總  
銀邦光著交部加等照千總例議卹其嘉禾桂陽郴  
州三州縣文武員弁著該大臣等確查奏明辦理賽

尚阿現由永州移營衡州與程裔采會籌調度各省  
新調官兵刻下計已陸續到齊著徐廣縉卽統帶得  
勝將弁兵勇迅速馳赴湖南衡州會同剿辦務期同  
心協力迅掃賊氛以慰朕望

二十五日癸酉正紅旗蒙古副都統阿彥達奏言

臣近閱邸鈔賊勢若如奏報所云窮蹙不支原  
無難一鼓殲除但恐賊匪別蓄奸謀仍用前由

永安竄逸故智將空城棄置占踞險要竄擾別  
城官兵又將曠日持久而賊氛不能迅滅是誠  
不可不豫爲謀慮也臣管見所及謹就現在軍  
務情形約擬四條敬爲我

皇上陳之一地勢宜審也自來行軍之道以明地勢爲  
要務湖南廣西各地方山深林密路徑險窄應  
請

飭下帶兵大員務將賊匪屯聚出沒之區道途形勢審  
察明確何處寬展宜於進軍何處險要宜於防  
守何處可以繞越何處可以飛攻然後相機而  
進攻堅擣虛不難聚族戮旃一募勇宜汰也查  
召募鄉勇多緣地方事起倉卒一時兵力未齊  
不得不借資衆力俾壯聲威然應募者多游手  
無賴之徒藉以託身餬口未必果有敵愾之心

應請

飭下辦理軍務各臣將無用之勇設法裁汰有得力者酌量留營用以哨探賊情防備口隘或尙不致債事一紀律宜明也我

朝營制立法盡善祇以承平日久武備漸弛不惟兵不知兵抑且將不知兵應請

飭下帶兵大員務將軍規條約三令五申俾將士兵丁

各遵約束一法令宜嚴也此次廣西軍營每獲  
勝仗其勇往出力者經該管大臣保奏往往多  
至數十員閒遇失挫之時從未聞以軍法從事  
卽具摺奏叅尙復留營差委以觀後效至失守  
城池之地方文武亦多曲爲開脫不加重懲臣  
以爲法不嚴則人多玩人多玩則令不行應請  
飭下辦理軍務各臣凡立功出力之人自當據實保奏

如有桀驁不馴推諉不前及防守不力失陷疆  
土者覈其情節重輕照依軍法立予重懲如是  
則法立令行人知感畏其有仍前玩愒而不殺  
敵致果者蓋鮮矣

同日江南道監察御史黎吉雲奏言湖廣督臣  
程喬采去年奉

命馳往廣西防堵該督專駐衡郡城中去廣西界尙三

四百里之遙駐衡幾及一年如結寨築堡守險  
設伏諸法均未講求當賊破全州渡黃沙河至  
永州正在抵禦喫緊之際該督乃於四月二十  
五日微服乘小漁船棄衡州而下城中官民泣  
留不得又適接到永州勝仗之報遂於五月初  
四日復往衡州自該督起程後沿途各屬驚傳  
制軍逃走均疑永州已破居民相率奔竄老弱



於十三日馳抵岳州府接見該府廉昌等俱以  
洞庭湖直接長沙府所屬之湘陰縣順風揚帆  
半日可達郡城必應籌備嚴密隨傳到紳士候  
補中書吳巽行官名士邁降調知府方宗鈞籌  
議據稱吳巽行住居洞庭湖濱之鹿角承辦敦  
善堂救生公局凡湖中大小漁船皆有名冊可  
稽向備堂中救生之用現值粵匪滋擾志切同

仇咸願出力捕勦可以豫爲雇募平日操練所需辛資雇價伊與方宗鈞捐備無須開銷臣隨與議定章程優立賞格傳集漁總承認挑雇漁船五百隻漁勇二千名漁洒五十名卽交該紳士吳士邁管帶就近在湖港密爲演習除平日由該紳士捐給資費外所需防堵經費及應行製備各項概由北省支應臣仍隨時委員會同

該紳士籌備哨探以期周備臣查勘事畢於十九日抵省連日接閱南省探報賊匪自竄出道州後連擾嘉禾等處刻下衡州長沙軍情緊急湖北防堵更加喫重亟應添兵防守相應請

旨飭下安徽撫臣挑取精兵一千名河南撫臣挑取二

千名配足軍火器械星速來楚以資分別堵禦再省城防守最重除現在募勇並團練外已挑

備存城兵一千名逐日操練又荊州駐防滿營  
除守城外並挑選精壯一千四百名豫備各路  
臨時禦敵之用

常大滄又奏言接督臣程裔采函稱拏獲奸細  
訊據供稱逆匪欲從衡州一路攻取長沙直撲  
湖北荊州囑卽飛致將軍密爲籌備臣查荊州  
緊接南省急應嚴密布置杜其竄越前經荊州

將軍台湧將前撫臣龔裕所謂宜施各營官兵  
一千名督同荆宜施道文輝分於水路擇要設  
防該將軍自在監利縣大江之白螺磯駐紮策  
應臣查荊州駐防滿營計兵四千有餘除酌留  
防城外應行挑選精兵一千四百名豫備堵禦  
茲值事勢較緊臣已於上游洞庭湖籌備漁船  
團練截剿等事則下游之白螺磯江面尙非喫

重荆郢之公安縣界連澧州水陸交通距郡城  
僅百餘里尤爲緊要且荊州府城及附郭之沙  
市鎮皆係商賈繁盛之區難保不爲賊匪覬覦  
臣現已飛咨台湧卽赴荆郡沙市兩處相地駐  
紮仍督同文輝將臣咨明所挑滿營兵一千四  
百名察看公安等縣各路口隘分派防守務期  
荆郡要地有備無患奏入

上命軍機大臣傳諭台湧常大瀆博勒恭武曰兩楚地  
界處處毗連自應扼要豫防所有常大瀆親赴岳州  
籌備洞庭湖漁船團練堵禦各事宜均著照所議辦  
理據稱湖北防堵陸路兵力尙單本日已寄諭蔣文  
慶陸應穀於安徽省挑取精兵一千名河南省挑取  
精兵二千名派定管帶將弁配足軍裝器械豫備調  
遣著常大瀆隨時確切偵探如湖南勦辦得手徵調

自可從緩儻有警信卽行飛調皖豫距楚較近亦不致有誤事機另片奏籌防荊州一帶並咨調駐防滿洲營兵一千四百名分撥駐守著會同將軍台湧提督博勒恭武熟籌妥辦該將軍巡撫提督等總須愼密籌防尤宜持以鎮靜不可稍涉張皇致滋驚擾

上又命軍機大臣傳諭蔣文慶陸應穀曰常大清奏湖北陸路防堵兵力尙單請補調鄰省精兵以資分駐



著蔣文慶陸應穀於安徽選備精兵一千名河南選  
備精兵二千名豫派得力將弁妥備軍裝器械聽候  
常大瀛咨調